

PRN Johor: Muhyiddin jawab tuduhan Tun Mahathir
Astro Awani
02 Mac 2022
Hasimi Muhamad

PAGOH: Pengerusi Perikatan Nasional (PN), Tan Sri Muhyiddin Yassin menafikan tuduhan Tun Dr Mahathir Mohamad bahawa beliau yang mengakibatkan usaha menolak Datuk Seri Najib Razak terbantut.

Tegas bekas Perdana Menteri itu, sebaliknya beliau yang menentang Ahli Parlimen Pekan itu sehingga Najib dihadapkan ke mahkamah.

"Apa saya pula yang dikatakan menggagalkan usaha untuk menghadapkan Najib kepada apa-apa perkara yang mereka telah lakukan?"

"Saya menentang mereka sebab itu saya jatuh. Saya tidak sedia untuk kompromi dengan apa yang telah dilakukan rasuah dan salah guna kuasa," katanya kepada pemberita selepas mengadakan sesi santai petang bersama masyarakat Cina di Dewan Undangan Negeri (DUN) Gambir, di sini pada Rabu.

Dalam pada itu, Muhyiddin turut memaklumkan sepanjang sesi santai bersama dengan pengundi Cina di DUN Gambir, beliau turut memaklumkan mengenai kerosakan yang telah dilakukan oleh Barisan Nasional (BN) kepada negara.

"(Ia melibatkan) kecurian wang yang besar, kes yang dibicarakan di Amerika Syarikat (AS) membabitkan Datuk Seri Najib..."

"Jadi, saya bercakap dan mereka seperti faham. Saya katakan, (adalah) terbaik untuk pilih PN," ujarnya.

Terdahulu, Dr Mahathir dalam suratnya mendakwa rakyat Johor merupakan antara rakyat Malaysia yang berjaya menyekat kemaraan Najib.

Malangnya, kata Dr Mahathir lagi, perbuatan Muhyiddin yang ingin menjadi Perdana Menteri, menyebabkan kerajaan Pakatan Harapan (PH) tumbang.

Dr Mahathir menambah, kerana (Muhyiddin) mengejar nafsu untuk jadi Perdana Menteri, beliau dan beberapa rakan yang berpegang kepada prinsip dan menolak kerjasama dengan UMNO telah disingkir.

Mengulas lanjut, Ahli Parlimen Pagoh itu berkata, kes melibatkan Najib tidak ada kaitan dengan politik.

“Saya fikir Najib sudah dihadapkan ke muka pengadilan.

“Jadi mahkamah akan buat keputusan... jadi ini bukan soal politik lagi, ini lebih kepada undang-undang.

“Itu saya fikir itu adalah lebih utama,” ujar Muhyiddin.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-politik/prn-johor-muhyiddin-jawab-tuduhan-tun-mahathir-349569>